

通微生於思

註 通微睿也 無不通聖也

故思者聖功之本而吉凶之機也

註 思之至可以作聖而無不通其次亦可以見幾通微而不陷於凶咎

易曰君子見幾而作不俟終日

註 睿也

又曰知幾其神乎

註 聖也

志學第十

聖希天賢希聖士希賢

道藏輯要

通書

八
星集七

註 希望也字本作睇

伊尹顏淵大賢也伊尹恥其君不為堯舜一夫不得其所若撻

于市顏淵不遷怒不二過三月不違仁

註 說見書及論語皆賢人之事也

志伊尹之所志學顏子之所學

註 此言士希賢也

過則聖及則賢不及則亦不失於令名

註 三者隨其所用之淺深以為所至之近遠不失令名以其有為善之實也○胡氏曰周子患人以發策決科榮身肥家希世取寵為事也故曰志伊尹之所志患人以廣聞見丁文詞矜智能慕空寂為事也故曰學顏子之所學人能志此志而學此事則知此書之包括至大而其用無窮矣